

晚

晴

移

詩

匯

晚晴移詩匯卷四十目錄

姜安節 一首

姜實節 六首

姜寓節 一首

魏允栢 二首

魏允札 四首

王攸 一首

王敵 四首

孫寶仍 一首

孫寶仁 三首

費錫琮 三首

費錫璜 九首

萬斯年 一首

萬斯選 一首

萬斯大 一首

萬斯備 二首

萬斯同 三首

周在浚 六首

周在延 一首

周在建 二首

汪文桂 一首

汪森 十首

汪文柏 十首

李繩遠 七首

李符 四首

曹釗 三首

曹鈞 五首

曹鈴 六首

曹鈴 一首

馬敬思 七首

馬孝思 三首

馬方思 四首

馬國志 四首

曹燾 一首

曹煊 一首

張道源 一首

張道深 二首

盛鏡 一首

盛大謨 一首

盛樂 二首

曹爾垣 一首

曹爾垓 二首

曹爾埏 一首

曹爾埴 二首

冒與晉 一首

冒嘉穗 一首

冒丹書 二首

冒車書 二首

冒漢書 一首

冒禹書 一首

冒殷書 一首

冒福書 一首

晚晴移詩匯卷四十

徐世昌

姜安節字勉中萊陽人有永思堂詩鈔

詩話國初姜如農給諫如須大行流寓吳中如農以  
謫戍宣城臨卒命葬敬亭山下勉中襲其遺齒歸壑  
萊陽先冢復南移家宣州廬墓側以  
居弟學在及如須子奉世皆居吳門

泊寶應

河伯由來悍秋霖勢更張屋沈餘井竈樹滅辨微茫萬里  
湖天闊千村稼穡荒農家無住處草舍架官塘

姜實節字學在號鶴澗一號仲子萊陽人有焚餘草

詩話鶴澗為明給事中採子工詩善畫山水法雲林  
萬吳中所居曰菽園文求其畫者必得其題句以為  
入城市人稱鶴澗先生求其畫者必得其題句以為  
重厲樊榭題鶴澗畫松云萊陽姜仲子矯矯清節後  
獨持滄海身畫松只盡瘦矮紙氣屈蟠疏影滿巖竇  
勿訝千霄意乃為般爾有題字不滿百其筆勢如籀

對之神魄驚慘淡見寒秀  
裴堂沒骨花遠笑釜熙熙

芮玉權招飲同章穎叔諸子卽席分賦

選石支茶竈留賓啟竹關繞籬雙澗水對酒一樓山屋小  
疑僧住林空羨鳥還買田吾有意終傍二溪間

江山游覽詩同長兄勉中賦

北固橫天塹登高杖短筇馬嘶殘夢月鴉避落帆風草木  
春城外江山戰壘中孫劉饒往蹟流覽意無窮

題黃鶴山樵聽雨樓卷

湖天過雨水冥冥吹綠東風草一汀絕似銅坑橋上望遠  
山如髮向人青

題畫筍

籜龍新長滿前汀想見枝生葉更青便擬與君同側耳秋

聲齊向畫中聽

虎邱

寺門歸路柳隄東十月繁霜唳早鴻  
好是日斜人去後一天紅葉下西風

程汝諧移居虎邱

斟酌橋邊市花園巷裏居石牆低見屋  
山溜暗通渠有客攜詩卷從親奉板輿  
此中多勝境應不羨華裾

姜寓節字奉世萊陽人有白雲集

程非夢移館題贈

十年流寓舊都亭餬口還憑子墨靈  
深巷停車門挂席閒階沒荳案橫經  
桃花浪卷千層碧楊柳風飄一向青  
握手故人長太息城南尙有少微星

魏允枏字交讓嘉善人有維風集

詩話交讓忠節之孫父爲孝子母爲節母崇禎間嘗承恩廕甲申後不出柳洲風雅交讓爲主盟同社深相推重

暨陽

烽燧遙天接大荒  
高城憑眺曉蒼蒼  
薜蘿乍長新官舍  
燐火宵明古戰場  
秋雨遠來江氣合  
夕陽斜墮澥雲黃  
三吳事業殘碑在  
矯首雲臺思渺茫

題法螺精舍

絕頂峯開祇樹林  
翠微俯瞰碧沉沉  
數聲清磬落山下  
門外日斜春草深

魏允札字州來更名少野號東齋嘉善人諸生有東齋集



詩話東齋爲忠節公孫豪於詩長洲顧使君嘗招爲  
文酒之會四方名士畢集座間詩俱成東齋獨瞠目  
不發一語俄而呼筆墨取座客詩徧和之東齋初爲  
詩一意宗唐晚乃學宋論者謂其品格在石湖誠齋  
之間

### 苦雪

日影亦欲出雲陰不知讓炯炯天之晴乃爲其所障因而  
致風雪自朔漸抵望有時或狂飛有時或輕颺舞空長漫  
漫前後非一狀城中千百家何必皆挾纊平地凍殺雀合  
向人腹葬我如老阿先卧起幸無恙獨恨無大裘徧覆逮  
幽曠計維挾重雲庶令紅日放

### 閒居

傍忠泉剩舊茅廬白拂青藤伴起居不願後身仍識字祇  
祈當代再焚書家風久矣宗三類世事終然付六如可奈

學徒常錯認轉將滓穢作清虛

憶弟

聽殘宵雨半瞢騰淅淅虛窗淡淡鐙繫纜江亭等潮上夢  
君野泊在西興

東園弟招同馮又三集翛然閣感賦

頻年故鬼唱秋風幾處離人歎轉蓬身到武陵應識得小  
桃雖在是衰紅

王攽字曷功衡陽人

桐林鋪望梅龍雨霽

梅雨行不息因之思碧山片青忽迎目悠然清心顏峯樹  
無改色滌滌整綠鬢飛雨復何來遽欲掠其間幻化豈有  
根微心終自閒

王敬字虎止衡陽人諸生有蕉畦存橐笈雲草

詩話虎止船山先生子與兄弢曷功齊名稟承庭訓勤問學篤行誼尤工時藝與邵陽車无咎補旃王元復能思攸縣陳之騷桃文稱楚南四家又有稱楚中三王者虎止元復及漢陽王戩伯穀也虎止晚築湘西草堂學者稱蕉畦先生詩樸老亦有夕堂遺範

秋初游邵陽城西酒闌有作

青山不可盡古郡環資川暑氣息連雨山容澹輕煙良辰策芳屐舊好相追旋長吟西門曲迴首城南天天容秋始澄覆釜幢碧圓舒襟愜所賞縱論忘蹠筌徙倚日藏松友云歸可遡置君桑落酒理我桐上絃鳴絃有希音酒酣無俗譖適志御清風泠然謝拘攣

二月山中卽事

萬壑遞層陰光分一徑深草叢留宿雨雲破見歸禽奇石

呈幽賞鳴泉懷好音林端清鑠發適伴越人吟

待友

小立閒階外凝眸日已西稻苗深一尺中有水禽嘯

別儲六雅

久向鏡中憐白髮初從月下倒清尊他年暇日容相念櫟  
樂湘西緣樹村

孫寶仍字孝堪又字孟滋號恕齋益都人官光祿寺署

正有恕隱齋詩

詩話恕隱爲文定子以任子官光祿遇公讌將相家  
子弟裘馬輕肥恕隱獨羸馬敝衣蕭然如寒素弟仲  
愚寶侗尤廉謹文定不使入京闕  
亦以廕授都察院經歷辭不赴

北上留別祖道諸公

相送高臺上川原渺若何漸辭青嶂遠轉覺白雲多名士

榮簪笏幽人愛薜蘿臨歧千種意惆悵付驪歌

孫寶仁字伯純益都人諸生有禹石樓集

卽事

野浦山溪一徑通柴門茅屋繞丹楓朝看雁鶩清波裏夕  
下牛羊落葉中

歸舟

燕子磯頭風浪生晉王塔頂晚霞明扁舟東下邗溝急坐  
失南徐鐵甕城

秋日雜詩

花宮香靄敞青螺方外招尋九日過兩岸雲山秋色迴一  
川鷗鷺夕陽多陶公入社頻傾酒小阮從游獨和歌禪室  
依然人已往可憐新塔倚巖阿

費錫琮字厚蕃號樹棲新繁人有階庭偕詠集白鶴樓集

詩話厚蕃爲此度長子工醫詩集已不存咸豐間新繁僧含澈雪堂合刻費氏詩三世四家厚蕃詩九篇爲最少片羽慈留蓋亦僅矣

滁州道中

策騎入長林村幽耐客尋秋晴紅葉潤山遠暮煙深江館寒潮斷河橋蔓草侵古人殘跡在空使候蟲吟

黃河

靈脈來天上渾流晝夜奔縱橫穿套口曲折下龍門地入榮陰斷山臨華嶽尊何須逢漢使便擬溯崑崙

登北固山

絕嶺橫江岸登樓望渺然潮來徐福島山出寄奴泉境界

分吳楚波濤混海天千秋爭戰地今喜靖烽煙

費錫璜字滋衡新繁人有掣鯨堂詩集

詩話滋衡爲此度次子豪放不羈詩如其人好爲古樂府沈文憲稱其蒼蒼莽莽時有古音此度有北征詩述亂離中事滋衡亦有北征哀歎曲至二千一百字自謂心血橫流吟成鬼泣嘗登之罌投詩於海痛哭而返蓋悲其才之不遇而求交於天吳陽侯其好奇如此

泛舟紅橋因至觀音閣

繡槳盪晨波春城千柳影水窗三十六捲簾落紅粉佛閣  
絳仙宮臙脂沈廢井鬼唱念家山桃花淚如綆

送閔山長入都

江浦柳堪折故人初入燕春風衣上輕寒日馬頭圓雨合  
清林色晴分綠嶂煙不忘塵外侶應指海雲邊

村夜

村夜百機息桑榆辨渺茫犬聲一巷月人語滿船霜秋遠  
蕎花靜宵深橘葉香幽懷無與晤獨立詠滄浪

京口夜泊

淮海孤燈暝關河一雁秋霜催兩鬢改潮裏眾星流鐵甕  
熊羆守金山神鬼愁勿矜天下險王濬下中流

黃湓阻雨

白鳥低飛樹影搖春愁如病酒難銷雨聲寒入何朝寺殺  
氣收爲半夜潮世事聽來成往劫驚風定後拔新蕉憑君  
莫指黃巢壘今日孤舟夢六朝

相逢

歧路不相識一言傾寸心贈君腰下劍不在直千金

邊辭



四月春風不度遼邊城氣候迴蕭條黃金臺上花都落長  
白山頭雪未消

狹袂輕衣別樣妝美人酌酒勸君嘗琵琶一樣清商曲彈  
到涼州便斷腸

旌旗慘淡照黃雲細柳營空背夕曛誰使射鵰人入塞朝  
廷自殺李將軍

萬斯年字祖繩號澹巖鄞縣人

詩話萬履安戶部泰諸子皆才公擇第五充宗第六  
沈誠第七季野第八並知名而澹巖爲家督明末避  
亂書則借老農雜作夜擁書集子弟環坐講  
習非雞鳴不止晚設教桃源書院多所成就

廢處山中友人沈哲先以詩見詢依韻奉酬

興子精神洽時形夢寐間賞音若流水回首獨青山雲卧  
隨時過鵬飛計日還鍾期幸謀面高轍許同攀

萬斯選字公擇鄞縣人有白雲集

詩話公擇嗜宋五子之學躬行實踐嘗議講學家多雜禪學彈駁不少假借梁洲以爲吳康齋之流

題錢清溪少參遺冊

清溪錢先生年少登仕籍上陳八事疏嘉謨盡碩畫毀撤  
魏監祠書院開講席從游南臯子正學重名節歷官之所  
至義聲奪人魄衡文齊魯邦多士手加額至今朝宇間彩  
鳳奮逸翮雖然遭疑謗微雲掩曦赫至誠能動人賢者腕  
爲搯風馳雲影過天清日復白義熙有全人奄然歸窀穸  
人亡四十年流芳動九陌遺文金玉倫含輝光四射撫卷  
誦琳瑯聲色雅可摘其人邈千古其心通一脈我生在後  
時丰采未親炙蒼茫潒水盡坐見寒潭碧

萬斯大字充宗鄞縣人

詩話充宗兼通五經尤精於春秋三禮各有書數百  
卷其別出者爲萬氏經學五書行世剛毅好義張蒼  
水死節遺骨未瘞爲葬之南屏  
友有喪未舉爲募有力者窆焉

姚江李珣孫石梁圖歌示八弟

十日畫水五日石王宰始肯留真蹟自從少陵爲此言詞  
人誦之常嘖嘖吾觀李老石梁圖揮毫落紙成頃刻意酣  
興盡何淋漓筆墨蕭閒殊自得乃知論畫當論人不在從  
容與促迫其人讀書風流士下筆自饒煙霞色假使胸藏  
一點塵終年操筆亦何益吾嘗持此論畫師不意於今乃  
得之石梁挂在秋天上萬仞危峯積一絲偏袒衲子何爲  
者卻向梁間足倒垂山邊石溜胸前瀉日畔秋雲頂上飛  
自憐赤城足未到何緣此日登其崖松風謾謾竦毛髮澗  
水泠泠清心脾八郎勸我珍此畫世間奇物原無價月下

風前試一看泉聲石色幾驚詫我詩汗漫不足存今時畫  
師誰喜聞山間澤畔有知己留待他年子細論

萬斯備字允誠鄞縣人有深省堂集

詩話允誠工詩五律尤精警爲李杲堂壻杲堂有詩  
曰偶然題得驚人句喚取吾家萬壻商嘗自以爲詩  
不如允誠輯甬上耆舊詩  
允誠助之搜輯所得爲多

溪上

夜雨青楓路秋風白豆家醉眠三戶酒吟謝一籬花山客  
雲爲服溪漁宅是沙人生貧亦適所惜鬢空華

香溪送酒

可念招提客眉攢欲遽回一尊連雨至雙屐破雲來游策  
鐙前計新詩醉後裁海棠殊解事早放數枝開

萬斯同字季野鄞縣人有石園集

詩話季野自以故國世臣不欲出仕有欲以博學鴻  
詞薦者力辭不就康熙間復開明史館王橫雲尙書  
招季野以布衣覆審史藁凡七年成藁五百卷其後  
部帙雖屢易終不能出其範圍以視元遺山陶南村  
殆有過之無不及也

### 寄五兄公擇

食飲不求精冠裳不求好但求免飢寒骨肉常相保微願  
竟難遂分飛各遠道欣欣向榮木喑喑投林鳥我乃不如  
斯喟焉傷懷抱

陶令常乞食顏公亦求米古來賢達人所遇猶若此況我  
與時違凍餒固其理且當守故居量力營菽水得食暫安  
眠聚廬亦可喜君胡事遠游經旬去鄉里未得一錢看反  
受三春餒伊優復伊優運命固如是不見張長公白首田  
園裏

述舊

我昔九齡時慈母中道棄此時赤日頽風塵匝地沸艱難  
營一殯辛苦且逃避晝行巖壑間夜宿虎豺際弱兒可憐  
人性命託兄弟穴居踰三年脫粟常不繼重返西皋居遂  
作灌園計田圃久成蕪桑麻亦已廢再葺耕耨基復理桔  
槔器時或從父兄荷鋤畦邊憩漸成田舍兒頗諳村居味  
謂當謝俗氛終事田家利不謂志難諧復迫居城內念茲  
釋耕耘欲識詩書字父意憐少兒親爲解章義晨夕寒松  
齋呼兒捧篋笥或時使應門間亦執巾屣窮愁寥泝中父  
懷每欣慰久侍少謹責亦自多歡睡飢寒相逼迫父往游  
嶺外日夕望還期中秋果返轡途次九江濱奄忽一夕逝  
寄信至江鄉慟絕中腸碎易簣在何時蓋棺在何地含殮

兒不親湯藥兒不侍天長日月久此恨終吾世返樞江西  
濱結廬西山次迄今已三年魂魄猶飛墜歎息我生涯憂  
患何遭備

周在浚字雪客祥符人有梨莊遺谷諸集

詩話櫟園諸子皆能詩雪客尤擅時譽著述精博南  
唐書注最有一時名又欲注五代史未克成書好收藏金  
石書畫一時名士皆從之游縹緲錦潭珠履金尊  
國初諸家詩中往往及之嘗游秣陵賦秦淮竹枝詞  
同作者漢陽羅世珍以獻嘉興曹偉謨次典句容張  
芳菊人晉江黃虞稷俞邵江甯吳晉介茲江夏周夢  
卹貞妻徽州王楫仲六合孫研如阿匯嘉興王槩  
安節江甯李郊董自黃岡杜紹凱蒼略華亭董含榕  
庵華亭張彥之挑侯長洲徐奇東來江甯洪嘉梳秋  
土及雪客弟在延隴客鄧孝威采入詩觀初集凡十  
人七

秦淮竹枝詞

布幔朱闌飾彩舟少年箕踞放中流三絃撥動涼州調故

老聽來盡白頭

端陽節近說青溪芳草門前踏作泥到得秋來人寂寞月  
明衰柳夜烏號

北人纔得解征鞍也學吳儂事事酸金碗銀盤都不用素  
磁月下試龍團

紫驪馬

愛妾不辭換金鞭且莫揮踏花公子醉射獵故侯歸蹠蹠  
嘶芳草驕騰亂夕暉道人重神駿何必透重圍

送倪閩公游晉陽

唐殿隋宮滿白蒿汾河千古尚滔滔當年客裏驅羸馬此  
日樽前贈佩刀極目彤雲沙塞遠荒城落日太行高晉祠  
過我留題處難老泉頭罄濁醪



寄懷馮青門次隴客弟韻

傳家清白有淵源百卷殘書擁一軒  
論少絕交譏到慨世無知己歎虞翻  
英雄埋沒歸黃土壯士蕭條掩席門  
萬事無如杯酒好桔槔亭畔自鉏園

周在延字隴客祥符人有攝山園詩集

登大梁城樓

秋草平隄舊戰場城隅滿目盡垂楊  
雁聲帶影經嵩少山色連雲認太行  
樂府新詞聲寂寞西亭殘卷事悲涼  
夢華錄續腸堪斷依舊金梁月似霜

周在建字榕客號西田祥符人歷官淮安知府有近思堂詩

詩話榕客爲櫟園司農子幼承庭誥刻苦於學當時耆宿如杜于皇蒼略張瑄星吳野人諸公皆與之游

牛首次黃自先別駕壁上韻

何處登臨勝清秋天闕間半林黃葉路一帶夕陽山帆過  
江仍靜雲歸袖更閒此中宜對月梯好不須攀

同湘靈蒼略遠度集飲瑤星松風閣

江遠軒窗靜登樓逸興同高歌驚鶴夢落日醉松風白社  
人還聚青山意不窮笑看鴉影亂城市晚煙籠

汪文桂字周士一字鷗亭桐鄉人貢生官內閣中書有

鷗亭漫藁

詩話桐鄉三汪周士其長次晉賢次季青皆能詩嘗  
合刻汪氏三子詩梨洲爲之序家自休陽移橋李得  
曹氏繼國居焉賓朋觴詠一時稱盛  
子孫改籍秀水代有聞人遂爲右族

禾中感舊

白頭無復古人存清晝蕭然靜掩門鋤菜徑迷新草色壘

巢梁浣舊泥痕數椽差足遮風雪千載曾經長子孫回憶  
家園好風景錫香粥白與誰論

汪森字晉賢號碧巢桐鄉籍休甯人貢生歷官戶部郎

中有小方壺存藁

詩話晉賢嘗與竹垞同定詞綜宦游邕桂編輯粵西  
詩載尚風雅重文獻有足多者家有裘杼樓藏書甚  
富與周青士沈山子輩講習詩古文辭所  
自爲詩五言擬陶七言效高岑皆見風格

寄屈翁山

皇輿產萬物維南聚珍奇彫珠或徑寸出浦光陸離珊瑚  
八九尺鐵網籠其枝象犀與翡翠瑋琕兼玻璃由來貢尙  
方筐篚不少遺寶氣之所鍾自然萃文詞屈子問世出抱  
才實不羈乃知三閭後根源浩難闕八極恣揮席摩霄翅  
高垂蒼茫洞庭野寂默聞咸池躋嶽攀雲松浮湘詠江蘼

自楚投建業揚颿快風吹縱覽故宮闕頓興黍離悲復過  
淮陰市弔古抵下邳心輸漂母飯勇惜博浪椎英雄事已  
矣千載若可追放蕩齊魯郊揚鞭路逶迤直窮岱宗頂瞰  
海騰晨曦曩蹟摻層崖徧讀封禪碑性豪任所往身輕無  
一齎犯雪度雁門白草連邊陲飛揚逐射獵箭叫如餓鴟  
獐鹿佐拌饌箏琶列蛾眉飲酣橫槊歌慷慨驚健兒孤蹤  
轉西北過秦車載脂河工仍壯觀襟帶思昔時空尋渭川  
竹浪采商顏芝感彼帝王業陵墓颯以衰客久習土俗荏  
苒歲月移欲藏韋布名轉使卿相知招延到上國翰墨紛  
淋漓天子方右文薦賢在皋夔脫身竟不顧肯被好爵縻  
鼓枻東入吳瀟灑開襟期春風亦媚客花穠鬧黃鸝一上  
姑蘇臺便辭震澤湄累月留檣李結友傾肝脾謂竹垞寶

劍脫相贈典裘勸金卮談鋒各雄驚如車駕駟驪揮戈動

壓壘舉旗輒登陴同調罷相關望塵徒盱睢傾心甘餘載

幾易裘與絺吾黨奈索莫抱華無由摘最惜庚申間鄧尉

梅紛披聞欲訪華門恩恩值臨歧郭子皋旭爲余言欣逢鐵橋叟

張大穆之下榻曾淹遲每嘗羨學殖屈指無肩隨奄有漢魏作

搖毫洗浮靡繼獲蘭谿郵忽枉璆琳貽祝翁子堅轉寄詩外刻集開緘

炫眾目詞藻何蕤蕤鮑謝許力敵賈董爲氣劇巨壑揚波

瀾罔敢測一蠡迄今栖羅浮身隱譽益馳馳鑿泉通丹岳擴

地增新棧奉母潔脩隨餘力視東菑闔戶擁萬卷此樂應

忘疲余從高涼還重切倚閭思滿衣鴈原淚家孟兄任高涼歿於官署

灑向天之涯浩歎當茲辰廉吏不可爲讀書貴立德恤民

寬以慈邦人頗懷惠無由恕彤墀尙冀一言重怒焉若調

飢乘閒願握手機穽枳樹籬釋此風塵色挹君熊豹姿雄  
談邇上古窳奧窮軒義再聆瑤琴韻宮商發朱絲鄙懷蓄  
已久擬共吐欽崎不爾入山林恐貽達士嗤

光孝寺

招提郡西北舊是虞翻苑祝髮來南能禪林契深眷茲維  
風與旛心動隨所轉見道發高言宗風垂一綫我來趁嫺  
涼徙倚石欄徧池荷已蕭索倒影開鏡面東爲菩提壇天  
矯虬龍見遺植傳齊梁修條鬱蔥蒨霜皮經雨緇露葉迎  
風顫想當結子時纍纍若珠串閒登卧佛樓梯級絕攀援  
爲感法門衰津梁豈應倦歸然鐵浮圖千像孰鍛鍊舍利  
知有無恆人罕流眄藏經在一室貝葉堆千卷緬懷唐相  
授莫覩灘哥硯日永鐘磬閒深林墜花片暑氣不侵人臨

流撤紈扇塵事苦恩迫佳游謝談讌漸覺暝煙生裊徊有  
餘戀

### 香槎歌

香槎千歲搜空巖一枝沈水同湖嵌奇珍磊砢不易致海  
南賈舶馳風帆星槎貫月海波漱石骨并藉昆刀剗斲成  
酒器注耐酣筵前好當金杯銜層崖疊嶂堆几案蒼翠鬱  
積高巉巉周遭向背似飛動疑有林麓羅松杉雲埋雪凍  
虎豹睡黃精可掘勞長鑱中含巨壑浸潭洞傾銀注瀉聲  
淅淅天生巨製供快飲神工鬼斧真不凡長虹吸川鯨掣  
海一飲數斗何嫌饒荷筍竹根最瑣細爵罍觥觶都應芟  
此杯遠至路萬里蠻煙蜚雨留封函憶當嶺表事跋涉鴟  
原老淚凝征衫桺桺樹底剖桺實炎州紫燕鳴呢喃鐙前

回首話疇昔捧杯玉指誰摻摻人生行樂暢胸臆對酒那  
計憂譏讒奇材識賞有同嗜顧我豈獨殊酸鹹作歌與爾  
共傾倒新詩肯寄雙魚緘

訪贈龔半千

幽人門徑別知在治城西適我來相訪逢君出杖藜圖書  
髹几列花草石闌齊款語曾無幾峰陰日已低

似子成高隱無慚處士名換鷺將乞米手寫代躬耕跡已  
稀城市交還重友生風塵余未謝肯許訂鷗盟

次和過浮谿館見綠陰之作

春紅別樹動成句池面圓荷貼水新自分蘂欄兼竹穢一  
生長作浣花人

斜日疏簾碎影鋪卑枝接葉坐鶯雛醉餘客散閑吟久翠



滴蕉衫獨據梧

觀打魚歌

漕溪東入大江水倏忽波濤走千里蛟龍移窟風雨過  
濺遂多魴與鯉結廬一向臨谿津溪明日映開青蘋四圍  
集網如牆列漁家三五爲比鄰以我遠來累晨夕爲引烹  
鮮話疇昔黃頭奴子手提網布網勢若干斤擲網沈波底  
初無聲舉網忽聞潑刺鳴銀刀霜劍縱橫出水族奔駭波  
濤驚須臾後網有牽動收來頗較前時重竭澤而漁安可  
常爲命黃頭且多縱網外脫漏仍揚鬚網中倔強安能施  
饗人操刀向碯几剝蔥屑薑鮮羹宜吁嗟好生天地德饗  
養斯須亦何益君不聞旣飽歡娛蕭瑟同杜老當時爲歎  
息

草堂春盡獨坐寘營偶檢東坡集見百步洪詩喜而

次其韻

嫣紅姹紫隨逝波春光一去如飛梭嗒然隱几亦何事強  
將詩酒空消磨舍傍隙地將一畝亂石點綴差成坡別有  
小池纔數武透泥出水浮新荷小僮汲綆煎茗熟沸騰鐺  
肉翻千渦方牀夢後起消渴滿啜有同鼠飲河昨者薰風  
生薄暑已尋刀尺裁輕羅新栽花竹繞窗戶灌溉每思郭  
橐駝藥欄蘇砌多位置蟻封蚓徑殊委蛇籬邊一犬自眠  
路梁間雙燕猶營窠物情意態俱可適興到覓句能幾何  
書堂幽悄靜如水不聞鄰曲來呼呵

魏叔子過草堂旋即言別次和原韻

聞到吳閫久相期匪浹旬病扶黃葉路秋老翠微人亂後

情多感宵分話更親如何劇回棹悵望出煙津

汪文柏字季青號柯庭桐鄉人官北城兵烏司正指揮

### 有柯庭餘習

朱竹垞曰柯庭除北城指揮干謁之奔怕判牘之繁  
亢而不廢吟詠解組歸來所作益工其過吳江盛澤  
云夜鐙千匹練秋雨半湖菱匪僅開宋元窠窠直造  
唐人之堂而嘖其藏詩之絕唱正不在多沈歸愚  
曰竹垞所稱不無溢美然謂時有佳句比於孟  
山人之微雲淡河漢疏雨商梧桐斯爲得之  
詩話季青菊影詩爲美西溟所賞時有汪菊影之目  
所傳誦者如竟夜不移香不樂晚年相對意相關數  
武淡香分對榻一窗生意出  
孤榮自是佳句惜全體未稱

### 翠微峰

肩輿望翠微縹緲如靈鷲雲端出一頭俯領眾峰秀緩步  
從山腰身輕一筇瘦林巒曲折移青紫頻舒皺香多不辨  
花韻細知鳴溜怪石脫雲胎傑閣依山構心清聖感僧晏

坐松林茂宮闕在東南  
疏螢成綵繡壯哉九重深  
宛轉千門透口麗遠煙消  
氣澄新雨後可憐大道間  
馬寸人如豆  
杏子口

舟藏邱壑深岡掩林巒集  
一徑杏花交探奇從此入  
憩息得精藍坦步多原隰  
紅雲深淺間隱見畸人笠  
花迷紫燕飛果任白猿拾  
榦老繡苔侵根潤芳泉溼  
來瞻大醫王豈授董奉業  
到此不知津徘徊空步屨

過崇效寺訪雪塢上人

墟里綻寒煙平林扶秋霽  
睠茲了心人苦吟爲活計  
夙披霞上篇未覲心先契  
漱茗粲周旋劇談忘久憩  
泛覽大藏書深研百千偈  
性海慕華嚴從師探密諦  
藤葉颺輕幡黃花補金砌  
屋角棗垂紅素令偏新麗  
靜對茁情思啟軒延

遠睇復恐俗物來預戒禪關閉

刺梅園老松行

刺梅園中老松樹三載相思今始遇果然奇絕不虛譽起  
伏猶龍令我懼長身宛蜒走當路猛爪攫拏如欲捕鱗甲  
渾身不知數猙獰頭角作吞吐噓氣爲雲噴爲霧奮鬣直  
往蒼穹訴誰敢攀髯觸其怒任彼登天復回顧山魈木客  
安能附空中定有雷霆護慈仁虛名落詩賦欲補十景惟  
君助蒲輪徵辟未必赴儻逢尊者無恐怖引杖降之歸鉢  
去是龍是松辨其故具眼人看方不誤

北墅

停舟尋北墅緩步繞迴廊粉羽撩秋草醒風拾霽陽佛香  
通小閣人影倒寒塘坦腹思幽榭苔花滿石牀

宿洪光寺

攜琴來絕壑脫網又披緇已悅聽鐘宿翻憐待漏時露晞  
花氣集山峻旭光遲搔首臨清澗松陰染鬢絲

盛澤

矮屋環湫市迴流界疊厓夜鐙千匹練秋雨半湖菱擊榜  
吳娃捷評珠賈客能辛勤終歲力猶未足催徵

登煙雨樓

十度憑欄九度晴今朝煙雨一舟橫雁飛難辨空中字鴈  
過惟聞暗裏聲輾浪成花吹寺壁冷雲如墨滾軒楹舉觴  
放眼吟長句始信高樓不負名

菊影

邱園高蹈識芳名入室忘形夜氣清數武淡香分對榻

窗生意出孤檠多情彭澤詩偏少沒骨僧繇畫未成夢斷  
枕屏留傲態缸花開盡月添明

簪鐙斜照粉牆間枝葉分明似可攀竟夜不移香不染晚  
年相對意相關解衣潑墨臨偏反扣戶邀人數往還嫩藥  
釀成光色好更宜杯底見南山

李繩遠字斯年號樵嵐山人又號補黃村農嘉興人諸  
生有尋壑外言

詩話斯年與弟武曾分虎同負文譽號三李斯年詩  
沈酣六朝浸淫初盛唐纏綿激宕骨秀氣蒼五言律  
尤雋拔晚耽禪學名所著詩  
文爲外言所以別於內典也

出潯陽郭由東城陂入廬山

始離潯陽郭言向名山行逶迤陟泉坂潦越瞰江城匡廬  
望猶遠四山已縱橫顧指心目豁披拂襟袖清巖長密林

夏天肅高霞晴陽崖翠葉暗陰壑丹樹明絕石路始轉入  
谷身已輕奔澗互流響棲禽挾鳴聲幽趣昔所愜放曠從  
此生宿痾真可捐俗累豈我搜誓當卜田舍將毋來玉京  
游嶽挈禽慶勅家疑向平踟躕待婚嫁豈非兒女情

黃鶴樓望漢陽歌寄查三

客行秋江水黃州見黃花洞沿武昌岸山城嘒亂鴉伊昔  
西征違故鄉遙登黃鶴悲路長我歸一年滯吳越值爾攜  
家上漢陽此時相聞不相見江魚塞雁空懷羨天末誰題  
錦字書桃花洞鎖沌陽縣縣外花飛催客還綠蘿芳草徧  
江灣轉眼三春樞初發看君雙槩到家山與我相從卧邱  
壑縱飲高吟恣行樂兩醉春陽懽宴多那知揮手仍離索  
汝作新詞送我游堪嗟來去盡江流蒹葭彌岸淒淒思覽



舊重尋黃鶴樓樓邊回首風煙夕隔岸臺池迴千尺只有  
晴川萬古深巴巫上下堪頭白渡口連船夾浦沙溷河迴  
合漢河斜佳人雲端望不得會難別易愁天涯旅店客眠  
殘月早長年一曲滄浪好杯酒難留夏口城片帆再渡巴  
陵道巴陵岸倚洞庭波便入湘南弔汨羅懷沙鵬鳥空詞  
賦滿目煙濤奈若何岳州樓館相思路落日蒼茫對雲樹  
轉見岷江接漢江大別山頭憶君住君住君歸經幾年江  
波連郭復連天輕颺欲借東流楫一夜吹迴及汝前

蒙陰道中

細草黃沙路清泉白石村周遭羣嶺出搖落幾家存棗樹  
春成巷梨花晝掩門誰邀驅馬客投館及黃昏

客夜有懷烏程吳右公明府董芑章參謀兩表兄

一送滇池草重行楚岸花故人俱遠宦遙夕倍思家沙暗  
三秋雁河明八月槎天風洞庭葉蕭颯墜霜華

泊長沙

湖外沙晴昨夜星曉風吹斷榜人停城迴嶽麓峯前樹帆  
下湘西渡口亭山氣北來橫紫翠江聲東轉瀉清泠荆南  
十月煙花暮悵望寒雲起洞庭

寄縉雲蔣丹崖廣文

鄭虔游覽不如君蒼嶺元都興絕羣天際煙花來夕雨仙  
家雞犬在春雲朱門高第今成市絳帳雙鬟盡解文吏隱  
千秋思往蹟道書珍祕想難聞

武夷吟酬別彭爾仁入山

武夷之山周百里三十六峯雲外起九曲洞瀠水浸山洞

天雖眾應難比漢祀秦壇共杳冥昇真歷歷有仙靈珠裾  
戲水澄空鏡玉袖迴峯轉畫屏吾聞籙鏗在初古堯封彭  
城號彭祖茲山坐隱七百春次子籙夷長籙武以此山名  
萬古尊彭城遺裔傳清門侯官彭郎好骨相此中疑是真  
曾孫當年綵屋空梁宴笙管淒哀偶然戀世人不記幔亭  
歌何由得與真仙見彭郎結交天下希武夷同好舊相依  
高吟一曲河梁別往日歌師今是非邀余並訪真人闕可  
憐歸客鳴榔發醉裏遙尋玉女花夢中解看天壺月信是  
名才不可求天宮咫尺汝應留寒梅仙掌春堪折遠寄西  
陵雪夜舟

李符原名符遠字分虎號耕客又號桃鄉嘉興人有香  
草居集

詩話分虎詩才力不逮兩兄然其清空雋逸一氣奔  
放亦非兩兄所能掩嘗游雲南登碧雞山遇道士謂  
其前身是廬山種菜僧因作廬山行腳圖  
期將終老焉後卒於閩中客次未遂其志

寄沈山子

自課童耕十畝田古橋村落結廬偏鄰花過屋捎吟袖畚  
水成溪活釣船屐響柴門詩弟子壘開竹墅酒神仙縑絲  
徑裏踟躕別惆悵西風又颯然

句容

雨黯孤城外遙峯翠靄沈馬疲愁日晚雁少覺春深江葦  
樵人擔山花汲婦簪茅山祠在眼徒有茹芝心

滁州

南北譙形壯東西路勢連河流煙樹外山繞郭門前過市  
求風櫛逢人問釀泉空攜詩屐在一宿又籠鞭

村居書懷

欲采梅花釀麴塵  
閉門日日醉青春  
中懷挾策偏違俗  
右臂傭書不救貧  
解事園丁教種樹  
能言籠鳥報來賓  
買山未定何山好  
村屋年年託此身

曹釗字靖遠豐潤人貢生有鶴龜集

翻書

閉門卻塵慮  
翻書覓韻題  
晚雲斜挂樹  
秋雨亂鳴溪  
得失應無礙  
窮通未可齊  
竹雞何所慕  
恰恰向人啼

指月庵

地偏人蹟少  
屋對亂峯開  
月放千巖雪  
松喧萬壑雷  
誦經馴虎至  
洗鉢豢龍來  
引興隨高衲  
長歌日幾回

霜華

霜華歷歷下庭柯坐久幽窗暗薜蘿風雨慣能欺客枕煙霞端不負漁蓑間情賦罷人思酒短札裁成雁渡河滿目征塵何日息邯鄲道上塞雲多

曹鈞字賓及號癭庵豐潤人貢生官內閣中書有癭庵集

舟中

晴日動林皋漁人蕩輕舫扁舟隨意放巖花齊欲吐村疏煙火稀山深樹石古遠望列羣峯一一青可數

漁陽道中

平原空悵望故國已荒邱獵犬穿林出灘聲抱石流月明燕嶺暮霜結薊門秋尙欲停車問悲笳動戍樓

歸懷

指顧平原憶舊游偶然乘興一登樓  
蕭疏短鬢三年夢寂寞長江萬古愁  
看世擬逢青眼客移封願得醉鄉侯  
西風蕭颯吹黃葉搖落寒林樹樹秋

再游黃山

三入黃山今又來諸峯偏向故人開  
林深夏帶高秋氣瀑瀉晴喧巨壑雷  
煙雨半沈春藥井雲霞全護鍊丹臺  
莫言竟日無多路選步應知爲惜苔

水自回環徑自分看山豈惜往來勤  
煙鬟黯淡將梳雨石齒峻嶒欲齧雲  
曲邃若非親閱歷幽奇端不付傳聞  
峯峯千仞堆寒玉初闢何人運斧斤

曹鎰字冲谷豐潤人官理藩院知事有雪窗詩集

雨中對瀑復觀龍潭水漲

驟雨劃然至，煙霧失長空。千峯蕩微影，飛瀑垂玲瓏。深潭忽怒沸，疑是蛟龍宮。響聲振林樾，雪浪生寒風。躡足心欲動，舉首搖雙瞳。下觸石骨碎，上與銀河通。誰爲開鑿力，吾將問洪濛。

伏日同伯兄眉庵松茨消暑

何處攜尊酒，東皋舊草堂。雨殘沙路細，風軟藥苗香。巢燕非時出，山蜂底事忙。老親憐弱稚，歡喜故相將。

入山曉行

竹輿隨徑轉，蘿薜挂煙霄。石險偏橫樹，溪回屢渡橋。霧收方見日，雲聚卽成潮。瀟灑紅塵外，青山認寂寥。

入紫翠林

人多穿洞出路狹，礙枯藤怪石如迎客。山猿不避僧，疏林



飛瀑落絕壑亂雲蒸素有登臨興梯霞上百層

坐轡雪亭

山湧濤千尺晴堆雪一溪雨隨雲去住煙接樹高低路盡  
疑天逼峯尊與日齊掃苔聊獨憩摩壁好留題

登文殊院

嵯岬開綫路杖履莫辭難嵐氣千巖雨山風六月寒石  
敵防客過松古學龍蟠縱目遐荒外方知天地寬  
曹鈴字孝符號嗇庵豐潤人貢生候選訓導

游披霞山

落日紅雲帶鳥飛重來登眺坐松扉秋林寒渚千村晚山  
寺無人月送歸

馬敬思字一公桐城人諸生有虎岑集

詩話一公爲正訖長子承遇庭之訓致力於詩五律  
風格雅近晚唐七律清和宛轉無離琢之跡古體不  
多見然亦非其所長也

### 題陳隱士山居

羨爾深山靜連宵不掩扉秋潭鶴影瘦霜草鹿胎肥歲酒  
先儲甕園絲半在機此中多隱者相識姓名稀

### 祝山如席上同錢飲光先生夜話

熟讀離騷夜雨殘牀頭周易共盤桓鵲從蜀破猶稱帝松  
自秦亡嬾署官盜冷瞿曇歸後託詩工摩詰晚年看草堂  
幽處梅花發偏與人間鬪歲寒

野衲雲山隱自招高僧列傳黨人謠書中甲子題三徑袖  
裏春秋紀六朝路覓西來傳梵鐸禪安東渡挂詩瓢心灰  
久已同枯井不逐風波似沙潮

得方爾止先生書

三載移家桃葉春  
釣船煙雨芰荷身  
他鄉白髮驚新長  
故國青山似舊貧  
座上曾逢周鐵虎  
車前猶泣漢銅人  
南朝多少尊官冢  
冷落高低卧石麟

宿僧房卽事

老僧留我西窗宿  
夜劈松薪煮新竹  
起來雲薄曉山青  
幾處疏煙出茅屋

懷爾升師

先生真隱逸  
家室未居城  
世說卿慚長  
人稱姓不名  
燕巢茅屋暝  
鶴啄芡湖清  
魚奴今年好  
方舟盪槩行

宜城卽事

宜城三萬戶  
十載半凋零  
畫閣移蔬圃  
朱門換荻屏  
煙波

當晚碧汀草出寒青獨上江亭望漁鑑亂客星

馬孝思字永公號玉峯桐城人諸生有覆瓿集屏山詩

草

詩話正譜有子六人皆工爲詩賴古居詩話謂屏山詩草源出香山在先輩中與龔山最近蓋翁婿論詩甚相契合也集中有手錄香山集一詩此其平生嗜好所在心追手摹頗能得其形似而才力薄弱不免流入平易一派

龍眠山

龍眠宜是逃名地憶昔公麟隱此閒儘有壺觴追北海不貪仕宦借南山桃梅逐路爭開落麋鹿親人共往還春色定知游客徧風塵憐我滯江關

游龍眠

少保幽棲處谿邊曲徑開澗茶留客坐蔬飯待僧來引水

窮泉脈當山壘月臺階前松柏古猶望後人培

贈田琢如

四郊雞犬是秦餘  
淳朴還推水竹居  
地僻肯從游子借  
徑荒先命野人鋤  
瓶封菊蕊冬藏酒  
饌入谿頭早市魚  
天半逢君能愛客  
不妨高枕當吾廬

馬方思字江公桐城人有寒檜軒集

讀史

青鳥西飛漢集靈  
柏梁臺是望仙亭  
空勞海上求方士  
笑殺金門一歲星

贈醫者

小隱山中采藥行  
向平五嶽未忘情  
此生不入長安市  
女子何從問姓名

寄張山人

伊人高卧白雲阿衣製芙蓉帶女蘿老去自傷別鶴操貧  
來嬾逐飯牛歌秋前黃髮同衰葉雨後青山守爛柯試問  
鹿門龐隱士何如采藥市中過

答王吉人

小隱無由問起居仲春始得故人書暫歸白社開新徑久  
羨青山葺舊廬芝草欲成黃綺志桃花不禁武陵漁相期  
過從清秋後詞賦奚煩問子虛

馬國志字勳公桐城人有懷亭集存

懷舍弟執公山中

送君山中居憶君山下路此夕獨徘徊涼風起煙樹

南郊飲陳氏精舍

水田十畝山人宅茅屋三間處士家留客共餐籬下筍呼  
兒頻煮雨前茶綠搖荷蓋添新漲紅掩柴門帶晚霞自識  
南塘村外路莫嫌乘興就黃花

曉發寄姚彥昭

酒酣月初墮夢回天欲曙解纜及秋晴挂帆向江路攬衣  
起徬徨已失維舟處潺潺胥浦流靄靄吳門樹舉目得清  
曠無言自來去獨有索居情空水隔煙霧

宿白雲庵

不覺看山倦招提遠近探偶尋黃葉路忽到白雲庵拄杖  
倚寒石臨風對暮嵐鋪牀置羹飯竟夕老僧談

曹爚字舒光號冷民晚號清風居士金山人有鈍留齋  
集

日知錄言四卷一  
三  
集次典壽香亭對菊限韻

雅會雜山農風流羨仲容秋光成五色寒影見千重日晚  
開高閣村深聞遠鐘杖頭吾未辦率爾一相從

曹煊字天生號崙山婁縣籍金山人諸生有釣灘詩草  
郊居

曠野風塵隔柴扉晝不開荷香浮碧水竹影漾蒼苔徑有  
漁樵至門無車馬來悠然情自得鷗鷺與徘徊

張道源字雲溪銅山人官江西鹽驛道有玉燕堂集

佛手柑

金色曾傳授記年好從清苦味真詮如何有手多相似不  
及天龍一指禪

張道深字竹坡銅山人有十一草



虎阜遣興

四月江南曬麥天日長無事莫高眠好將詩思消愁思省  
卻山塘買醉錢

千秋霸氣已沈浮銀虎何年卧此邱憑弔有時心耳熱雲  
根撥土覓吳鉤

盛鏡字于民武甯人有寄軒詩鈔

春日

春日天氣佳好鳥林外鳴卽事都無慮幽居心自清日入  
農務靜披衣步前楹野老來相過有酒時一傾遂此生前  
樂無爲身後名

盛大謨字于野武甯人有字雲巢詩鈔

詩話于野與弟于民水賓以詩文相鏃厲兄弟間互  
爲師友一篇出摘摘不少恕皆以堅偉險怪爲尙論

者謂可與甯  
都三魏並稱

龍潭石

十月風煙盡寒潭清我神淋漓蚪蚪字剝落核桃皴日月  
勞賓主溪山遞故新漁歌方欸乃萬石自嶙峋

盛樂字水賓武甯人有劍山詩鈔

宿驛南

停驂問古驛山色入樵歌惟有客愁遠不堪秋雁過天低  
雲氣老野闊北風多此去柴桑近東籬今若何

上韓侯釣臺以詩投淮水弔之

平臺風散晚煙痕往事悲涼落日昏意氣已隨飛鳥盡功  
名但有釣魚存漢家草草夷人族淮水汙汙蕩古魂浪跡  
若非逢漂母今來何處弔王孫

曹爾垣字彥師號中郎嘉善人諸生

送林武宣之楚

金風秋氣肅霜林翳遶道游子辭故鄉登途展遐眺寒煙橫蒼莽積翠迷深窅揚帆千里去雲山一何杳江聲日夜聞清猿傷客抱抑鬱念伊人抗情寄物表俯仰今昔間爰披江蘼草相思秋水清相見春風杪同心蕙與蘭兩地參與昂側身雲夢澤離懷空繚繞申章託繾綣意氣良自寶曹爾垓字錫九嘉善人有石竹山房橐

己酉九日墨林小集

杖策將登高高岡隔煙霧風急塞雁哀驟雨當窗度邀賓水上亭披襟探毫素圖成山吐雲繪出花垂露良辰足歡娛肯爲窮愁誤作賦臨清流銜杯對高樹紅葉影蒼茫黃

菊悲遲暮捲簾夜色昏水田下白鷺未盡茱萸觴客迷東  
郭路舟子遙相招濯錦江頭渡

許墅關曉行

吳關迷曙色已挂一帆風淡月臨清靄平波映碧空雞鳴  
茅屋裏人語畫船中極目長天望朝雲繞樹紅

曹爾埏字彥博號博庵江南華亭籍金山人諸生有嶺  
雲集道邇堂集

蘇門訪孫夏峯先生不值

大雅久沈淪老成俱寂寞當代仰哲人此地宗伊洛弱冠  
揚駿聲幽奧窮墳索文藻麗班揚風流邁李郭德輝固冲  
融高懷復磅礴素履難具陳古人恨不作歲晚慕隱淪散  
髮卧邱壑變化歎猶龍騰騫迅孤鶴詎意勦華時未遂穎

箕樂遠謝蘇門隈燕薊暫棲泊山水失主人孤雲將焉託  
遙望子雲亭松花自開落

曹爾埴字彥範一字季子號範庵江南華亭籍金山人  
貢生官桃源教諭有綠野春深堂類稿

魏卜臣曰彥範詩如  
小棹平川風日流麗

### 折楊柳

去年折楊柳還與君同陌今年折楊柳關山千里隔思君  
不可見攀條長歎息遙遙玉笛吹總是傷行役

### 毘陵道中

兩岸暮潮平風帆一葉輕人煙隨日暝漁火傍沙明纖月  
流高樹悲笳接廢營鄉關情更切回首望孤城

冒與晉字晉卿號暘谷如皋人諸生有蜉蝣集

烏衣巷

門掩斜陽戶網塵烏衣巷改尙逡巡舊時燕子飛還到莫向堂前認主人

冒嘉穗字穀梁號珠山如皋人諸生考授主簿有寒碧堂集

上巳修禊水繪庵分賦

和風蕩林樾霽色搖春岑入門灑飛泉映水颯幽禽花竹日淡沱煙景何清深節序一以佳矧邁瑤華音握蘭正婉婉折柳嗟侵尋且漱溪邊石一聽邱中琴

冒丹書字青若號卯君如皋人諸生考授州同有枕煙堂集

詩話青若爲集民幼子與兄穀梁並能文章有聯珠雙璧之目嘗有宵人欲刺集民青若正侍側急以身

蘇受四創幾殆李  
艾山爲賦詩紀之

贈柳敬亭并題左甯南軍中說劍圖

玉帳登壇夜論兵將軍出塞氣縱橫可憐多少銜恩客寫  
向丹青只柳生

同其年看池荷

幾折沿隄路相攜坐此中天連千頃碧花漲一池紅欲去  
日將沒看來意不窮江南有愁客對此憶吳宮

冒車書字富五號硯癖如皋人

秋興

幾縷秋煙一抹霞空階涼雨似山家常憂來日不相得詎  
是我生真有涯徑繞林皋封落葉宅連雉堞亂歸鴉候蟲  
也似知遲暮鳴過牆陰藕豆花

岵山數葉且留餘猶記成童佩鞮初王謝弟兄過絡繹崔

盧兒女笑軒渠蓼花水齧中丞墓柿葉聲寒開府墟先中丞撫

海陵後家於吏部遺書亦寥落先吏部藏書存什我姑飽

食到華胥

冒漢書字七巒號小山如舉人

春日病起

久病卧步屋階前芳草生客多相惜意鳥作可憐聲柳意  
遲新雨花心動曉晴江鄉煙景好三載總關情

冒禹書字玉簡如舉人諸生候選訓導有倩石居遺草

秋來

忽忽年華傷暮遲秋來懷抱最相宜感時實下江州淚觸  
目空多宋玉悲蕭瑟荒庭鳴蟋蟀蒼茫遠水下鷓鴣寥寥



天地吾何託幾度臨風有所思

冒殷書字文足號借廬如舉人諸生有梨雨堂集春浮

集何文居集萬卷樓初二集

詩話王簡文足箕疇皆鑄錯老人子與巢民二子可  
稱競爽文足時已中落有句云姑遲一食當再食更  
壞何衣補此衣可謂一寒至此矣

己卯上巳過顧大念哉

比來纔覺負年華馬齒驚心暗暗加百舌盡情颺上巳東  
風著力落桃花管絃不結文人社詩酒聊尋處士家窮日  
追歡還卜夜嚴城何必鼓頻撾

冒福書字箕疇如舉人諸生有桐蕉書屋集臚齋紀年  
詩

潯陽得文足家兄書賦答

相思誰似弟兄真書到潯陽滯四旬楓葉雨寒前浦雁蘆  
花風老隔江蓴遙傳築墅名丁卯近說編詩首戊辰入夜  
尙能斗酒否好緣雙鯉問精神

晚晴移詩匯卷四十終